

# Probablamein in luf

18 nuorsas scarpadas el territori dall'Alp Sura e dalla Foppa da Cavals en Val Medel

DA HANS HUONDER / ANR

■ Il luf caschuna pli e pli stedi donns vid animals da casa. Avon rodund in'jamna ha probabel el scarpau 18 nuorsas sisum la Val Plattas el contuorn dall'Alp Sura e Foppa da Cavals en Val Medel. La cumprova definitiva, schebein igl ei stau in luf, ei denton aunc buca arrivada tiel cantun. «Entochen che la DNA ei avon maun, cuoza ei aunc entgins dis. Sin fundament dils indezis che nus havein, stuein nus denton quintar ch'ei retracti d'in luf.» Quei ha il cau digl Uffeci da catscha e pesca dil cantun Grischun, *Adrian Arguint*, detg sin damonda dall'Agentura da Novitads Rumantscha. Las nuorsas s'udevan tier ina muntanera da plirs tschiens tocs ch'ein alpegiadas el territori sisum la Val Plattas e Val Lavaz. Il diember da lufs el cantun Grischun ei carschius cuntuadamein ils davos onns ed igl ei da supponer che quei svilup cuntaschesi. Cons lufs che vivan il mument el Grischun ei buca dil tut clar. En lur indicaziuns sebasan las autoritads sin indezis concrets mo era supposiziuns. Ar-



Il luf ei adina puspei sin viseta en Surselva. Nossa foto muossa in exemplar fotografaus avon biebein treis onns a Trun entras ina fototrapla dalla survigilonza da catscha.

MAD

quint quenta ch'ei retracti da rodund 25 tocs egl entir cantun Grischun. Che quella populaziun da lufs carschenta meina a conflicts ei clar, surtut leu nua che animals da casa ein buca protegi sufficientamein. Dapertut – sco per exempl ellal alps – ei quei buca pusseivel ni realisabel mo cun fetg grondas stentas. La problematica cumbi-

nada cun la preschientscha dil luf meina a discussiuns era en auter cantuns e las tiaras vischinontas.

➤ PAGINA 3

# En Val Medel ein 18 nuorsas vegnidas scarpadas

Cul diember carschent da lufs s'augmentan era las attaccas sin animals da casa

DA HANS HUONDER / ANR

**■ Avon rodund in'jamna ein 18 nuorsas vegnidas scarpadas el territori dall'Alp Sura e da Foppa da Cavals sisum la Val Plattas en Val Medel. Sin fundament dils indezis avon maunc se-tracta ei probablamein d'in luf.** Las nuorsas s'udevan tier ina muntanera dalla Bassa alpegiada questa stad el territori sisum la Val Plattas entochen Val Lavaz. Tenor il cau digl Uffeci da catscha e pesca dil cantun Grischun, *Adrian Arquint*, vegnan las nuorsas survigiladas duront il di d'ina pastura cun tgaun. Tgauns da protecziun accumpognan buca la muntanera, rimnar las nuorsas e clauder ellas duront la notg ei strusch pusseivel en quei territori fetg vast e per part fetg spundiv. Medemamein eis ei strusch pusseivel da reagir ussa cun in tgaun da protecziun. «Ils purs ston spirtgar ditg sin tgauns da protecziun. Quei va buca d'in di sin l'auter», di Arquint. Ils tgauns da protecziun ston medemamein s'endisar vid la muntanera. Dapi igl eveniment cun 18 nuorsas scarpadas vegn il territori observaus. Schebein il luf ei aunc el contuorn ei grev da dir. Ina lubientscha da sittar in luf vegn dada dalla confederaziun pér il mument ch'il luf ha scarpau 25 nuorsas enteifer in meins el medem territori. Avon che la DNA ei mintgamai fatga ei quei meinsvart gnanc pli pusseivel. Suenter igl eveniment sisum la Val Plattas en Val Medel ein ils purs ed ils pasturs dallas alps ella regiun vegni orientai ladinamein.

## Regulärmein attaccas

Ils davos onns han lufs procurau repetitivamein per sgarschur tiels purs sisum la



Il cau digl Uffeci da catscha e pesca dil cantun Grischun, **Adrian Arquint**, suppona ch'in luf hagi scarpau las nuorsas en Val Medel. El di: «Entochen che la DNA ei buca avon maun savein nus denton buca quei definitivamein.»

FOTO H. HUONDER

Surselva, oravontut mintgamai la primavera. Differentas ga ha el scarpau animals manedels, surtut nuorsas. Aschia ei quei per exemplu era stau il cass miez matg 2013 a Rabius. Lezza ga ha el scarpau treis nuorsas e dus tschuts che sesanflavan en in claus. Pli u meins il medem temps dig onn 2016 ha il luf scarpau pliras nuorsas a Mustér/Quadras. Dapi en-

tginas jamnas haveva ei dau gliez onn indezis davart la preschientscha dil luf en Surselva. Quels derivavan da plirs lo-ghens, da Ruschein entochen Tujetsch. Il fevrer 2017 ha ei allura dau in cass excepiunial a Trun. In luf ei siglius sur la porta sut en in nuegl e ha scarpau leu ina nuorsa. Probablamein eis el fugius quei mument ch'il pur ei s'avischinaus al nuegl.

Fuss quei buca stau il cass, havess il luf probablamein scarpau dapli nuorsas. Ton tiels purs sco tier la survigilonza da catscha era ei aunc buca enconuschenet ch'il luf penetreschi en in baghetg e fetschi leu donn. La fin finala ha in luf lu era scarpau pliras nuorsas la fin da matg 2017 a Rueras. Las nuorsas eran claussas tenor las directivas pretendidas. L'empre-

ma attacca sin las nuorsas visavi Dieni haveva il luf schizun fatg da clar, pia buca la notg. Las notgas suandontas era ei reussiu alla survigilonza da catscha da fotografar pliras gadas il luf cun agid d'ina fototrapla. Rodund treis jamnas avon haveva in luf scarpau e blessau pliras nuorsas a Valzeinza sut Mumpé Tujetsch.

## Opposiziun en autres regiuns

Las davosas jaminas han lufs era scarpau nuorsas els cantuns Uri e Berna. Discussons concernent il luf dat ei denton pli e pli era en autres tiaras vischinontas. Aschia era ella regiun dil Tirol dil sid ell'Italia. Il zercladur ha in triep da lufs scarpau in tschappel nuorsas el territori dall'Alps da Seis. Quella attacca fa-tschenha buca mo ils purs, mobein era ils turistichers. L'organisazium da turissem responsabla per quei territori ei dil meini che las alps stoppien vegnir pasculadas per aschia restar attractivas era pil turissem. Ella suppona che biars purs saves-sien calar da tener nuorsas quei mument che talas attaccas daventien praticamein la regla. Cheutras fussi la cultivaziun dal-las alps periclitada. Ils turistichers ein denton era dall'opiniun ch'il bien num dil Tirol dil sid savess pitir d'in pli grond diember da lufs. Ei mondi en quei connex era per la segirtad dalla gieud. Medemamein cun arguments turistics ha la Corporaziun d'Ursera scumandau tgauns da protecziun questa stad sin sias alps en Val d'Ursera, sco quei che Radio SRF ha rapportau il gliendissidis endamaun. Tgauns da protecziun sappien es-ser malsegirs e periclititar carstgauns. Quei savessi esser da donn pil turissem da vi-andonts.